

梁

園

風

雅

梁園風雅卷二

李空同

七言古詩

桂巖行

白龍不識漁溪惡化爲魚服遭人縛黃髮先生困  
泥阻白馬小兒氣揮霍道傍朽木藏蛟龍霹靂猶  
聞夜火紅寄謝少年諸數公貧賤豈必皆愚蒙桂  
巖紫芝春盡發騎驢且覓商山翁

古白楊行

百泉東岸三古楊下枝掃拂書院牆上枝瑟瑟干

穹蒼空山野陰雷雨黑柯榦冥冥動山壁剪伐難  
爲棟梁用盤踞番逃斧斤厄但見白日悲風發寧  
知六月撐霜雪煙色慘愴精靈聚孤根倔強源泉  
裂憶昨訪古憩其下居人不敢留車馬落籜尚禁  
牛羊食汙穢頗遭縣官打丞相古柏霹靂碎將軍  
大樹空蕭灑岡頭石路莎艸長孫邵李許同一堂  
春風漂泊予到此不見古人惟古楊古楊蕭蕭暮  
流急波翻浪倒蛟龍泣衛女幽憂拾錦花逋臣寂  
寞愁難立君不見太行羊腸莫比數上有毒蛇下  
猛虎樵斤獵火不虛日桂柏椅桐氣悽苦嗚呼楊

兮楊兮爾何盤根據茲土

弘治甲子屈我初度追念往事愴然動懷  
擬杜七歌用抒憤抱云爾

母之生我日初赫缺突無煙榻無席是時家難金  
鐵鳴倉皇抱子走且匿艾當灼臍無處乞鄰里相  
弔失顏色男兒有親生不封萬鍾於我乎何益高  
天蒼蒼白日凍今辰何辰夕何夕嗚呼二歌兮歌  
思長吾親儼在孤兒傍

有弟有弟青雲姿以兄爲友兼爲師十五徧探古  
人籍十九不作今人詩從兄翱翔潞河側寧料爲

殤返鄉邑孤墳寂寞崔橋西渺渺遊魂泣寒食鳴  
呼三歌兮歌轉烈汝雖抱女祀終絕

有姊有姊天一方風蓬搖轉思故鄉歲收秣黍不  
盈百男號女啼常在傍黃鳥飛來啄屋角碩鼠唧  
唧宵近牀洪河鬪蛟波浪怒我欲濟之難爲梁鳴  
呼四歌兮歌四闕我本與爾同肉血

古城十家九家空有姊有姊城之中峭壑直下五  
千尺鷄鳴汲回山日紅犁鋤縱健把豈得病姑垂  
白雙耳聾小孤癡蠢大孤情霜閨夜夜悲迴風鳴  
呼五歌兮歌五轉寒崖吹律何時變

冰河蜿蜒雪爲岸忽得鯉魚長尺半剖之中有元  
方書許我是月來相看臘寒歲窮多烈風日暮高  
樓眼空斷梁都北來道如砥熟馬輶輪爲誰絆嗚  
呼六歌兮歌未極原鴒爲我無顏色

丈夫生不得志居人下低頭覲面何爲者薄祿不  
救諸親饑壯志羞稱萬間厦東華軟塵十丈紅入  
擁簿書出鞍馬王門好筭不好瑟何如歸樵孟諸  
野嗚呼七歌兮歌思停極目南山空翠屏

土兵行

豫章城樓饑啄烏黃狐跳踉追赤狐北風北來江

怒湧土兵攫人人叫呼城外之民徙城內塵埃不  
見章江途花裙蠻奴逐婦女白奪釵銀換酒沽父  
老向前語蠻奴慎勿橫行王法誅華林姚源諸賊  
徒金帛子女山不如汝能破之惟汝欲犒賞有酒  
牛羊猪大者陞官佩綬趨蠻奴怒言萬里入爾都  
爾生我生屠我屠勁弓毒矢莫敢何意氣似欲無  
彭湖彭湖翩翩飄白旗輕舸蔽水陸走車黃雲捲  
地春艸死烈火誰分瓦與珠寒崖日月豈盡照大  
邦鬼魅難久居天下有道四夷守此輩可使亦可  
虞何況土官妻妾俱美酒大肉吹笙竽

襄陽歌

襄陽山勢何所似東如翥鳳西虎蹲墓堆累累不  
空地於中豈少英雄魂大隄先前花豔時朱樓細  
柳黃金羈但看舊園歌舞處掘發金釵知是誰君  
今有酒不飲恨不駟馬軒車馳縱及金張許史  
將焉爲身後埋沒蒿艸疇見知

苦雨篇

波濤日陷蛙鳴起梁園一夜滿城水屋廬半塌塌  
人死可憐哭聲水聲裏憶昨出飲黃昏歸零濛已  
灑力尚微豈知中宵鬼神怒雷翻電滾雨如注我



時怵惕不得眠  
牕燈撲殺無計燃  
洶湧一任霹靂走  
恍惚若有蛟龍纏  
地軸震仄久益急  
披衣起坐坐復立  
鷄鳴氣勢幸稍緩  
積漸天明日光入  
琴沾書溼開我堂  
二儀高下雲低昂  
黃鸝曬翅燕語梁  
前何恐懼今何康  
萬事夷險難豫量  
及時弗樂頭顱顧  
蒼

送何舍人齎詔南紀諸鎮

先皇乘龍去不返  
悲風慘淡吹宸極  
四海哭若喪慈母  
百官狂走天爲黑  
憶昨臨危坐御床  
手挈神器歸今皇  
密語丁寧肺腑裂  
三老親聞眼流血  
金

騰立剖石室秘此事難從外人說我君謙讓不可  
得割哀踐阼弘祖烈日月重懸萬國朝雷雨赦過  
羣方悅越南海北霹靂動蠻夷盡奉王正月此時  
九道使臣出舍人亦輟螭頭筆白馬朝騰薊北雲  
錦帆暮閃江沱日江沱秋交多烈風洞庭雲夢俱  
眼空巴陵縣令舍人兄接詔會弟西樓中童年題  
詩在高壁六載不到紗爲籠南嶽以南惟峻山苦  
蒸毒霧何盤盤天王新令雷電掣妖蛇不敢啼林  
端五溪官長喘喙拜黔州父老垂淚看却瞻蒼梧  
雲氣黑斑竹臨江怨幽色翠華縹緲空冥間此時

此恨誰知得君不見馬援柱孔明碑剝落黃蒿裏  
千年莓苔待君洗萬里之行自此始歸來何以獻  
天子

上元訪杜鍊師

宣皇昔時乘八風御龍遊戲行煙空馬前兩兩侍  
玉女別館多在蓬萊宮朝天宮中舊時殿樓臺晝  
鎖無人見琉璃井塌青苔滿松柏森森月如練鳴  
呼往事難具陳燈火如山又一春北斗壇西訪隱  
淪我師黃衫白氎巾坐我更致西樓賓玉杯激盪  
赤瑪瑙織罽四角銀麒麟酒肉山堆滿堂醉仙厨

往往來八珍孝宗之朝五真人師也磊落當其倫  
自言召見親賜食曾把丹書獻紫宸如今寂寞看  
春色銀魚玉帶無消息豈惟魚帶無消息欲語吞  
聲淚沾臆勸君對此莫酸辛世間萬事如轉輪且  
將芝草供生計聊與煙霞作主人月偏彩雲當牖  
生旋呼兩童吹玉笙聞師妙得逡巡術百壺倒盡  
還須傾古來仙子尚誰在飲者翻垂千載名名垂  
千載亦區區酒闌燈昏夜復徂不見秦陵艸已宿  
春生樹啼雙老鳥此時亦應羣帝趨金燈翠旗光  
有無

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵  
湖明公昔時此堂居麋鹿熊豕當窗趨洞庭日落  
風浪湧倒影射堂堂欲動慄淡誰聞紫芝曲獨善  
不救蒼生哭先帝親裁五色詔老臣曾受三朝祿  
此時邊徼多戰聲曳履謁帝登承明謝安笑却淮  
淝敵魏相坐測單于兵九重移榻數召見夾城日  
高未下殿英謀密語人不知左右微聞至尊羨自  
從龍去不可攀公亦臥病思東山湘娥含笑倚竹  
立山鬼窈窕堂之側上書苦死只欲歸聖旨優容

意悽惻內府盤螭縷金織賜出傾朝皆動色白金  
之鋌紅票記寶鈔生硬鴉翎黑崇文城門水雲白  
是日觀者塗路塞城中冠蓋盡追送塵埃不見長  
安陌人生富貴豈有極男兒要在能死國不爾抽  
身早亦得君不見漢二疏千載想慕傳畫圖即如  
草堂何處無祿食覩竊胡爲乎乃知我公眞丈夫  
嗚呼乃知我公眞丈夫

二月四日部署宴餞徐顧二子

春日載陽官署幽東吳二子過我游庭空日斜吏  
人散窅然何異經林丘今晨驚蟄暖氣達昨夜哀

鴻呼故儔中庭古槐蒼蘚溽上有百鳥何啁啾倉  
庚交交刷其羽君看巨細各有求明時冠軒幾邈  
逅得暇胡不攀淹留自從去年識徐顧令我意氣  
傾南州徐郎近買洞庭柁顧子亦具錢唐舟浮生  
飄轉若飛蓬倏忽聚散誰能謀風光爛熳况復爾  
願寫清壺銷客憂故人苦稱不好飲舉杯入唇還  
復休妙歌時時激慷慨鄙夫何以答綢繆嚴柝沉  
沉静夜色北斗倒挂城南樓祇恐天明驅馬出攬  
袪延望河之洲

送人還關中

君不見劉毅貧時一擲常百萬君不見唐時鄭虔  
道高坎壈腹無飯英雄際會各有時人生豈必皆  
如願關中老翁燕薊客昔何慷慨今何怨王通無  
謀翻叩關楊雄有賦何由獻君歸射獵南山麓得  
錢且學樊侯販

送鄭器

梁園仲冬雪積阻慘慘風亂平沙樹泥深馬瘦不  
得行縹緲金陵在何處青絲絡酒提玉瓶強出送  
子城東亭旦望淮河暮江水雲飛鴻鴈天冥冥

秋夜徐編修宅宴別醉歌



徐郎三杯拂劍且莫舞聽我擊節歌今古曲長調  
悲不易竟天地熒熒月東吐燕山八月風力怒落  
葉交加映尊俎愴時感事百憂集死別生離同一  
苦身逢累朝全盛日弘治之間我親覩朝廷無事  
尚恭默天下書計歸臺府五陵鞍馬速雷電千官  
氣勢如風雨却憶年年秋月時日與爾輩同襟期  
如澠之酒差快意袒跣呼號百不思絃張柱促衣  
冠禍綜覲崩奔學士疲倉皇世事難開口物極則  
還理宜有羸疾已分沙田草遭逢復折都門柳富  
貴在天得有命人生反覆如翻手不見去年臨別

處吞聲躑躅鶯求友邂逅來暄不自知隔絕榮華  
爲誰守歌殘酒乾天欲曙門外驪駒已西首哀鳴  
胡鴈亦南飛露濕羣星朝北斗

發京別錢邊二子

秋風淅淅吹燕山游子杖劒出燕關車脂馬飽夜  
將發錢邊二子來相攀此時羣星覲上帝駸鸞翳  
鳳雲之際君不見牽牛與織女一水盈盈獨流涕

東園翁歌

東園翁今六十餘面常泥垢髮不梳身藏寶劒人  
不識反閉衡門讀古書此翁十五二十時歎唾落

地迸成珠陸機不敢以伯仲管輅警敏空嗟吁生  
鱗卽與蛟龍伍未汗寧同凡馬趨爾時射策黃金  
闕三百人中最英發驂騑舉足狹萬里便欲登天  
攬日月豈知德尊常軾軻獨買扁舟泛吳越三十  
年來萬事變富貴於我真毫髮歸來灌園種瓊花  
荷鋤自理東門瓜夜眠海月掛丹牖畫看江風滾  
白沙遼東合有逢萌宅齊西再覩陶朱家北郡李  
生三十六擯斥高歌臥空谷前輩後輩道豈殊同  
坐同行限江麓東望東園亂心曲安得逐爾騎鴻

鵠

董公衙賞緋桃行

吁嗟董公垂老官不遷途雖坎坷志不變三歲提  
兵兩列衙此事堪傷亦堪羨二月南風捲章水黃  
昏西省開芳宴刑司軍司皆集衙盆中緋桃俄放  
花董公捋髻向客誇客起環視咸咨嗟情酣展轉  
移燈照酒氣撲花花欲笑逢人合與世酩酊衰顏  
苦被春勾調君不見玄都觀裏樹不與武陵源上  
殊時來開落各異地董公董公今宵與客且倒花  
前壺

戲贈周紀善

廣文先生何爲者十欲出門九借馬只今徒步襄  
水濱衰鬚漠漠常風塵鳳凰在笄鷄啄食苜蓿關  
干半青黑君不見楚筵醴罷暮歸來甌塵妻子無  
顏色

寄殷給事中歌

斑鳩賦形百鳥內化爲蒼鷹百鳥避秋空萬里試  
一擊灑毛紛紛稱鷹意迴旋簸蕩風沙開海宇光  
清鸞鳳來天地炯炯元精回此以贈君君毋猜金  
陵雖隔黃金臺汝翊紫蓋臨三台飛章御覽不十  
日道路闐靜豺狼哀憶昔匹馬長安走殷何徐陸

皆吾友楚姬娉婷華色並殷生稜睂獨方口何郎  
短小亦不醜化離今各經年久夢寐猶存上苑花  
飄零寂寞西湖柳丈夫致身貴不朽陟要階華亦  
何有賈誼才名信早知姚崇相位非難取大江滾  
滾東北趨羣龍霜蟄鼉叫呼汝登鳳臺念老夫爲  
我致一鳳之雛我不敢玩亦不敢狎誠心餽飼毛  
羽全使聽簫韶翔舜都

### 送陳冠歌

虎子墮地氣已麤驂騮汗血自爲駒陳生垂髻骨  
卽殊雙瞳炯炯唾成珠前年汝與計吏俱承明謁

帝未生鬢丈夫志欲日月並雲雨且使蛟龍須冬  
風獵獵吹楚湖憐汝送母催楚艫調羹臘盡江門  
水戲彩春停汴上都憶昔乘驄按南國汝在諸生  
獨英特三秋自阻北飛鴈萬里今逢舊顏色私計  
彭宣晚必親敢言裴儉前能識寒溫始知君子厚  
杖屨番增世人惑瓠子柳煙風日和力疾送子臨  
黃河汝親日望泥金使老夫擬作瓊林歌

芝舫行

有序

崑崙子之來也李子觴焉及夜瓶芝自墮以爲  
舫行觴焉平可藥二觴行之穩持之輕客大駭

笑歡盡醉而李子賦詩

霜嚴夜清月在南燈明酒溫客氣酣銅瓶玉芝鏗  
墮地客將傳玩誇神異仰芝把蒂行金杯蒼文古  
紫當筵開已驚激灩菡萏動更詫屈錯蛟龍迴憶  
芝初出盤精氣雲流石立魍魎避赤箭琅玕色盡  
枯神訶鬼守求非易泄秘真遭天地怒懷珍顧使  
時人忌自從獲芝升我堂琴書几席俱輝光晴日  
徐看瑞氣合炎天每挹仙雲涼燕山豪士來何方  
悲歌起舞宵未央芝乎自銜亦太異頓令四座深  
杯觴觴行逶迤月轉白月色芝光巧相射酖醕觸



擊瑪瑙碎淋漓迸落眞珠赤君不見玉屈卮金叵  
羅珠花繡艸枉自豔停杯聽我芝泮歌

朝飲馬送陳子出塞

朝飲馬夕飲馬水鹹艸枯馬不食行人痛哭長城  
下城邊白骨借問誰云是今年築城者但道辭家  
別六親寧知九死無還身不惜身爲城下土所恨  
功成賞別人去年賊掠開城縣黑山血迸單于箭  
萬里黃塵哭震天城門晝閉無人戰今年下令修  
築邊丁夫半死長城前城南城北秋艸白愁雲日  
暮鳴胡鞭

送仝儀賓朝天歌

風吹黃塵暗河甸行子拍馬來相見春寒晝陰沙  
冥冥九衢散亂花如霰自言手捧紫瑤函馳軺謁  
帝黃金殿甥壻當朝禮覲同往來遣答猶親面南  
陽貴人骨固殊敦親倍錫明光宴八議輕微實惋  
惻時情詎識皇心眷開函爛熳百色備龍盤鳳曲  
流雲氣繡女咨嗟鋪緒工體裁脗合三宮意吳羅  
疊雪祗懷赧南金象齒堪沉避自離京國十年餘  
每懸金闕憶金魚班行日侍諸王聘混一曾瞻萬  
國書君過上林聊駐車春風舊樹花應舒有暇更

欲問西湖掃地垂楊今有無

結交行贈李沔陽

古人結交如種稷今人當路栽荆棘世間萬事各有極人生何必相傾仄君不見李沔陽五馬昨朝天天冰地裂衝寒煙三月不遇見天子歸途困頓心憂煎南行波濤值洶湧蛟龍失勢鼃鼃踊留滯聊栖梁孝臺醉歌真據侯羸塚却憶當年侯未鬢識者盡道驂騑駒落筆遽掩羽獵作挺身遂上青雲衢百戰不侯李廣辱一麾出守延之吁峽霧光射下和玉月明淚迸鮫人珠李沔陽汝無學雲夢

吞亦莫效江南哀六龍挽車日月輪萬里簸蕩風  
沙開棄君舟楫理銜轡有人物色騰驤材

送李中丞赴鎮

黃雲橫天海氣惡前飛鶩鶴後叫鶴陰風夜撼鑿  
無間曉來雪片如手落中丞按轡東視師躬歷嶮  
隘揮熊貔已嚴號令偃鼓角更掃日月開旌旗椎  
牛李牧將士躍射虎李廣匈奴知屯田金城古不  
謬賣劍渤海今其時塞門蕭蕭風馬鳴長城雪殘  
春草生低飛鴻鴈胡沙靜遠遁鯨鯢瀚海清不觀  
小范擒戎日誰信胷中十萬兵

觀燈行

宋家累葉全盛帝寬大實皆稱令主百姓牛馬徧  
阡陌太倉米粟憂紅腐宣和以來遂多事嗚呼爛  
費如沙土海石江花湧國門離宮別殿誰能數羣  
臣諛佞祇自計天下騷然始怨苦正月十四十五  
間有勅大駕觀鰲山萬金爲一燈萬燈爲一山用  
盡工匠力不破君王顏此時上御宣德門樂動簾  
開見至尊奔星忽經於御榻明月初上堆金盆傾  
城呼噪聲動地可憐今夜鰲山戲窈冥幻巧百怪  
聚金蛾翠管堪垂淚借問韋臣誰云是李師師外

有蔡京與蔡攸夾樓錦幄羅公侯丞相之幄當前  
頭奚兒腰帶控紫騮如花少女擎綵毬但聞樓上  
喚樓下黃帕籠盤賜玉羞月高鳴鞭至尊起幄中  
環珮如流水爭道齊驅輦路窄寺橋窈窕塵埃白  
火樹龍燈又一時千光萬燄天爲赤常言宴安成  
禍基從來樂極還生悲君看二帝蒙塵日數月東  
京荒蒺藜

石將軍戰場歌

清風店南逢父老告我已巳年間事店北猶存古  
戰場遺鏃尚帶勤王字憶昔蒙塵實慘怛反覆勢

如風雨至紫荆關頭晝吹角殺氣軍聲滿幽朔胡  
兒飲馬彰義門烽火夜照燕山雲內有于尚書外  
有石將軍石家官軍若雷電天清野曠來酣戰朝  
廷旣失紫荆關吾民豈保清風店牽爺負子無處  
逃哭聲震天風怒號兒女床頭伏鼓角野人屋上  
看旌旄將軍此時挺戈出殺胡不異艸與蒿追北  
歸來血洗刀白日不動蒼天高萬里煙塵一劍掃  
父子英雄古來少天生李晟爲社稷周之方叔今  
元老單于痛哭倒馬關羯奴半死飛狐道處處懽  
聲噪鼓旗家家牛酒犒王師休誇漢室嫖姚將豈

說唐朝郭子儀沉吟此事六十春此地經過淚滿巾  
黃雲落日古骨白沙礫慘淡愁行人行人來折  
戰場柳下馬坐望居庸口却憶千官迎駕初千乘  
萬騎下皇都乾坤得見中興主日月重開再造圖  
梟雄不數雲臺士楊石齊名天下無嗚呼楊石今  
已無安得再生此輩西備胡

劉子有金陵之差遂便覲省

使君昔居紫荊關日登燕嶠望吳山逢人顏色鬱  
黯默對酒涕泗交潺湲使君南向金陵去孤帆夜  
拂春天樹旅枕常欹月落時夢魂先到雲飛處揚



子江頭青艸斜大孤山前開杏花行人三月重回  
首游子一年初到家出門煙艸滿芳甸鳳凰臺接  
麒麟殿遊陌聯翩追宿娛墨場婉孌羅賓讌人生  
意氣無南北白馬青袍動江色卽看艤舸石頭城  
還聞稅鞅鍾山側鍾山岑律壓秦淮燕趙風雲入  
望來芙蓉秋鴈多愁思問君何日錦帆迴

李進士醉歸圖歌

誰將一幅雪白絹放筆橫掃黃金殿五雲飛花白  
片片李生胡此開生面御河塵昏楊柳暮髣髴初  
罷南宮宴皇帝龍飛十二春同時三百登要津曹

生李生余最親曹生李也傳經人光耀雖云丈夫  
末不聞致君須致身自汝白手扣閭闔想像紫陌  
行騏驎曹留李歸事亦變李生意氣圖中見醉歸  
扶起杏林下眼花熟人無識者飛鳥來窺進士巾  
游絲故冒誇官馬卽論此馬亦有神畫出紫燄方  
瞳真嚼勒鬣膝如待人長行大步不動塵絡頭韉  
鞭純用銀細巧似織翻江鱗汝昔出門驢無騎曹  
生共被甘鹽齏比許欲入周召列成就恥與蕭朱  
齊於乎男兒一旦榮華果如此生不報國老空悔

畫魚歌

呂公手持畫魚障，清晨掛我北堂上。島嶼晴開雲  
蕩蕩，衆魚出沒隨風浪。四壁蕭蕭起寒漲，嗟此數  
尺障。天機妙入神，信手掃絹素，慘澹開金鱗。濠梁  
斷裂東津遠，任公掣釣滄溟晚。此時天黑衆魚出，  
鼉鼉徒穴蛟龍返。或言乘潮萬魚集，細小亦趁雲  
雷入。咫尺波濤有得失，屈強泥沙恐難立。細觀又  
似洪河風崑崙，旣道龍門通霹靂。殷殷行地中，鯉  
眼下射盤渦紅。非獨一身生羽翼，亦有數子隨飛  
龍。山根小魚更無數，鱣鮪昂藏噴煙霧。美人修竿  
淇水闊，漁子孤舟洞庭暮。我生好奇古，覽畫心不

動呂公此障誰爲之令我一見神色竦想當經營  
始筆端萬鈞力五湖齊傾四海立空窗滾滾拔浪  
急陽侯逆走天吳泣不然千魚萬魚何由集我聞  
神怪物變化不可料點睛破垣古有兆卽恐風雷  
就壁起饕人揮刀莫相笑

林良畫兩角鷹歌

百餘年來畫禽鳥後有呂紀前邊昭二子工似不  
工意吮筆決皆分毫毛林良寫鳥祇用墨開縑半  
掃風雲黑水禽陸禽各臻妙掛出滿堂皆動色空  
山古林江怒濤兩鷹突出霜崖高整骨刷羽意勢

動四壁六月生秋騰一鷹下視睛不轉已知兩眼  
無秋毫一鷹掉頸復欲下漸覺颼颼開風毛匹綃  
雖慘淡殺氣不可滅戴角森森爪拳鐵迴如愁胡  
皆欲裂朔雲吹沙秋艸黃安得臂爾騎駟驍艸間  
妖鳥盡擊死萬里晴空灑毛血我聞宋徽宗亦善  
貌此鷹後來失天子餓死五國城乃知圖寫小人  
藝工意工似皆虛名校獵馳騁亦末事外作禽荒  
古有經今皇恭默罷游燕講經日御文華殿南海  
西湖馳道荒獵師虞長俱貧賤呂紀白首金爐邊  
日暮還家無酒錢從來上智不貴物淫巧豈敢陳

王前良乎良乎寧使爾畫不直錢無令後世好畫  
兼好畋

吳偉松窗讀易圖歌

仄巖泉流石無數素壁濛濛起煙霧君家屋宇在  
城市何以堂上生松樹側聞江夏生氣酣掃毫素  
絕筆風雷拔地起意匠鑿天天爲怒泰山古根生  
眼前俄頃縮出徂徠山懸蘿挂薜裊裊黑復有草  
舍松之間窗間老人鬚髮秃手翻一編周易讀空  
山瑟瑟翠濤激長干冥冥暮花撲遠知旣已死希  
夸不復作青丘石室杳何許恍然置我此溪壑翻

愁一夕雷電入六丁追書上寥廓又畫石下根屈  
曲如老龍胡奴暝蹋孤巖崧蓬頭赤脚露兩肘月  
明汲泉山澗中却憶前年召畫師江夏吳生亦與  
之短褐垢臉見天子禮貌雖村骨格奇帝令待詔  
仁智殿有時半酣被召見跪翻墨汁信手塗白日  
慘澹風雲變至尊含笑中官羨五侯七貴同看面  
請觀此幅松舍圖黃金失價連城賤吳生吳生太  
氣岸一言不合輒投硯

鍾欽禮山水障子歌

鍾生始學戴文進後來頗自出機軸山林槎枒波

漫靡骨格雖傳氣不足此幅樹石差可意綴得茅  
堂傍江麓連山遠勢亦可取轉折頗似瀟湘曲竹  
嶼陂陀九疑隔蒼梧洞庭溼雲白黃陵美人把瑤  
艸天寒日暮行空澤鷓鴣雙飛鴻雁宿榭樹颯颯  
江水碧細看谷口花又疑武陵源孤舟欲往不可  
得對此彷彿聞清猿亭間更著四老翁衣冠各異  
鬢耆同紫芝山深石漠漠悵望萬里來悲風人生  
有形貴自適我今胡爲塵埃中觀畫感事面顏紅  
有畫如此何必工歌徹目送滄洲鴻

觀序上人所藏陶成畫菊石歌



陶生畫菊石老艸有筆力此石與此菊今爲序公  
得兩株徙倚石根前古石苔蘚屈連錢復有餘株  
散在地平坡襟艸青煙縣回株點綴花翩翩含姿  
弄態不一足背向纖穠皆可目突如大家貴介女  
珠翠雖搖氣莊肅近時名手計汝和此生筆力方  
之過江東徐霖學畫石效顰差勝王與何亦知神  
品多冥契下筆巉巖拓高勢石磊磊兮菊漫漫清  
霜古路花斑斑遠意頗類東林山東林昔築蓮花  
臺彭澤攢眉不肯來歸家對菊獨銜杯序公叢林  
號白足不重蓮花番重菊終然畫餅不充腹何如

種向西山麓秋林寒芳采服食煮石煉藥亦爲得  
愛鷹愛馬古有之不獨序公何太息

張侯藏張翬山水歌

張翬有名成化間大塗小抹成山水樹石燥硬筆  
意古往往人間落片紙此幅麤淺色更枯或謂非  
翬出其子張侯識鑒天下精物物如金見沙底爾  
家圖畫千萬軸素壁高堂安用此寧知上智不滯  
物牝牡不貴貴者骨尺山即如對玄圃草屋臨崖  
氣出沒崖根林堂頗清迥遠雲澹沲開秋嶺霜蘿  
細紆巖檻暝昏猿接掛花溪靜自從去年拋棄官

夢想山遊駕江舸見此拂衣便欲往攀緣轉玩情  
無那崖亭更著一人坐斗絕看書樹婀娜張侯豪  
曠人共知敏捷言談皆勝我鹽車鬱沒騏驥棄蹇  
拙逢時每相左崑崙洞庭不我隔異時倘結煙霞  
果

畫馬行

嗚呼驂騑不可見世人任耳不任目玉勒金羈滿  
地行可道中無千里足君收此馬畫者誰凝豪苦  
意求其骨尺縑颯爽毛鬣動淩風似欲真馳突曹  
霸畫馬無此精拂拭慘澹神氣生細觀決非近代

物印押剝落無姓名四海只今多戰爭安得此馬  
一敵萬絡頭騎出千人驚擒戎破虜任橫行

### 畫竹行

鄮陵王孫稱竹溪手自栽竹堂東西已詫白晝雷  
雨入遽使六月秋雲低王孫拈筆傳竹神不得乃  
憶能傳人黃荃異世與可滅本朝頗數東吳真一  
幅千金擲不惜有時客來挂之壁壁上階前翠相  
射風行琳琅戛摩仄四座慄慄生寒色陂陀沙嶼  
意勢遠洞庭木落瀟湘晚白雲悠悠去不返叢篁  
寂寞雙妃怨於乎畫形難畫心黃陵鷓鴣啼至今

月不常盈日中昃人生何必長悲吟堂有佳賓却  
有琴美酒一酌還一斟竹溪子竹葉歌竹枝醉  
據玉案吹參差左杯酌竹右畫師李乎孔乎吾則  
誰更須名手畫六逸并畫王孫逸爲七

題京口人山水圖

青山逶迤如北固山下彷彿京口樹茅堂花蹊三  
月暮萋萋舊州春遊路一從畫師掃煙墨客堂日  
夜流江色江色依微帶甕城遊子歸魂逗南北

遊棲賢橋歌

雷泉峽激石龍從日湍山陷回光動吁嗟此壯觀

萬古誰爲開。渦黃潭黑竊莫測。秀黛碧玉何崔嵬。  
人言窟底有龍臥。氣吐白晝常風雷。去年重九登  
吹臺。翹望名山思婀娜。今年今日誰料吾醉蹋窮  
山。躡礪砢拂衣欲上萬仞壁。濯纓還就孤崖坐。秋  
風吹林猿狖語。浮橋橫空裊相拄。嵐寒細飄瀑布  
雪。峰雲破碎芙蓉裂。金芝瑤艸真無繚。紗仙燈  
暮明滅。君不見此橋今千年。谷冷跡絕無人煙。巖  
剝苔蝕石漠漠。太白紫陽俱我前。對此不須更慘  
愴。明朝且上香爐巔。

楊花篇

洛陽三月東風起楊花飛入千門裏只見朝紫上  
苑煙那知夕逐東流水苑煙流水無休歇暖日輕  
盈度仙闕趙女瑤臺貯綵霞班嬈團扇啼明月綵  
霞明月幾沈輝陌上行人亂撲衣征夫柳塞愁看  
鴈少婦香閨嬾上機柳塞香閨萬餘里艸色連天  
度隴水玉門關外雪猶飛章臺樹裏風先起誰家  
浪子千金馬平明挾彈章臺下頭上羅巾玳瑁簪  
腰間寶鉞珊瑚把蹋絮來尋賣酒家持香坐調當  
壚者當壚美女怨陽春笑掇楊花襯繡裯青樓薄  
暮難消遣白雪漫天愁殺人冥冥漠漠春無極此

時惟有楊花色一朝風雨靡蕪爛獨慘垂條三歎  
息

明星篇

明星出地一丈高天門沈沈魚鑰動沙隄露下玉  
珂寒直廬鷄唱金蓮重千門萬戶曉鐘發明星漸  
高河漸沒燦爛疑侵翔鳳樓依稀故抱飛龍闕鳳  
樓龍闕帶曾城翠輦朱衣夜夜行黃昏競奏催花  
宴天明猶聽打毬聲蘭煙桂火輝如日明星迢迢  
照不入百子池頭青艸生長信宮中紫苔集艸色  
苔香秋復春此日乘槎若問津明星曉落宵還見



白髮黃金愁殺人

漢京篇

漢京臨帝極，複道衆星羅。  
煙花開甸服，錦繡列山河。  
山河自古稱佳麗，城中半是王侯第。  
峻閣重樓夾道懸，雲房霧殿森虧蔽。  
牧豚賣珠登要津，樊侯亦是鼓刀人。  
時來叱咤生風雨，奄見吹噓走鬼神。  
平津結兄蓋，侯弟杯酒相看何。  
意氣執鞭盡是虎賁郎，守門不說長安尉。  
長安烽火入邊城，挺劍辭君萬里行。  
去日千官遮馬餞，歸來天子降階迎。  
朱弓尚抱流沙月，寶劍常飛瀚海星。  
不分燕然先勒石。

石直教麟閣後標名豈知盛滿多仇忌可惜榮華  
如夢寐第宅田園奪與人丹書鐵券成何事霍氏  
門墻狐夜號魏其池館長蓬蒿三千劍客今誰在  
十二珠樓空復高後車不戒前車覆又破黃金買  
金谷洛陽亭榭與山齊北邙車馬如雲逐陰郭豪  
華真可憐雲臺將相珥貂連當時却怪桐江叟獨  
著羊裘伴帝眠

去婦詞

孔雀南飛鴈北翔含顰攬涕下君堂繡幙空留並  
茵苔羅袂尚帶雙鴛鴦鴛鴦誰不羨人生一

別何由見只解黃金頃刻成那知碧海須臾變賤  
妾甘爲覆地水郎君忍作離弦箭憶昔嫁來花滿  
天賤妾郎君俱少年瑤臺築就猶嫌惡金屋妝成  
不論錢重樓複道天中起結綺臨春照春水宛轉  
流蘇夜月前萋迷寶瑟煙花裏夜月煙花不相待  
安得朱顏常不改若使相逢無別離肯放馳波到  
東海薄命難交娣似知衰年恨少姑嫜在長安大  
道接燕川鄰里攜壺舊路邊妾悲妾怨憑誰省君  
舞君歌空自憐郎君豈是會稽守賤妾寧同會稽  
婦郎乎幸愛千金軀但願新人故不如

冰車行

黃門飛鞚西北趨白馬如龍血如珠萬人齊呼冰  
窖開大車小車如山來但見風行九市陌寧知玉  
積五侯宅道傍暍士僵闌干唇乾口噪真大難侯  
門宴罷夜烏起朱殘粉落明星裏君不見積冰化  
作堂前水

鹽井行

山頭井乾生棘蒿山下井塌不可熬官司白牌促  
上庾富家典牛貧典女誰其使之華陽賈華陽賈  
子多少年擁金調妓高樓邊夜馳白馬迎塲吏曉

貫青絲還酒錢君不見場吏乘酣氣如虎鹽丁一  
語遭箠楚

清夜引

桂魄團團霜兔泣玉龍夜吟冰喉澀仙人起蹋白  
芙蕖手撚一枝珊瑚株伏猊香噴紅氍毹蠟鳳啼  
春蝦卷鬢九華丹燄奪行月五虬轡雲聲軋軋銀  
箏翠管聲咿啞繁謳襍舞懽意匝盤中紫棗大如  
瓜誰其擎之萼綠華雙桂逶迤頭兩密情芳緒  
芳且嘉瓊城夜半重重閉偷桃小兒安得至

雷電行贈憲卿何公美其伐也

黃塵蔽日賊大戰元年年除夜雷電我軍後之天  
威前一鼓破賊淮陽川昨者此賊生齊東眼中久  
已無河嵩渡河轉戰勢轉熾長矛健馬六石弓睢  
陳飛刃晝接白毫穎劫火宵連紅一路生靈餓餓  
虎中原殺氣回春鴻於時中丞秉鉞出誓不滅賊  
如此日三軍素壯元老猷諸將咸遵丈人律孔明  
綸巾不離首羊祜輕裘僅掩袂精采遽增朱雀幟  
運用或叅白猿術陷陣直如風掃葉追北譬之蜂  
就窠二月朔日振旅歸夾道桃花照鐵衣傾城盡  
出牛羊犒父老爭迎錦繡旂喜氣真隨陽氣發愁

雲化作輕雲飛捷聞天子喜動色滿朝譽公降褒  
敕白金綺繒寧足酬異日凌煙看畫墨

邊馬行贈太僕董卿

治賢在朝亂在野唐虞圉牧皆賢者國君之富馬  
爲急次者僕卿首司馬漢人五郡開河西中土始  
聞胡馬嘶此馬硠礪一直萬黃金寧輕璧可賤奪  
駿曾空大宛國按圖徑上長安殿苜蓿雖誇近苑  
春荆榛誰記沙場戰致遠翻歸草木功清芽秀味  
走胡驄三邊盡誇連錢種六苑羣嘶汗血風人亡  
世殊霜雪急艸豆蕭瑟馬骨立驂騑氣喪甲士苦

長城窟寒鴻鴈集朝廷每勤西顧憂四岳拜手推  
董侯攻駒暫出薇花廨攬轡遠過蒲萄州行卿官  
冷心不冷固知董侯今伯同磧沙日黃雲錦亂徵  
侯定上金華省

### 鈴山堂歌

先生昔隨玄豹住丹壑冥濛日煙霧先生今與赤  
龍飛南望碧山空翠微茅堂蒼蒼雲氣入囊琴鎖  
戶陰陰溼沚蘭沙濕春鳥暮庭松月清夜鶴立君  
不見山下石崦嵎千尺磯經年不釣苔成衣玉璜  
羊裘各有分可問王孫歸不歸



散篇

怨歌行

漢主十離宮涼至花盡歇面面窗玲瓏煙紗印秋  
月天公顧我笑手弄雙玉玦但笑不肯留去若流  
雲沒憂來抱團扇揚顰望丹闕

白霧樹累累作花

不作江南客空登河上臺夢中到孤山笛裏落寒  
梅今朝走白霧萬枝參差開紫宮散花女騎龍下  
瑤陔恍惚弄珠人玉塵生羅韞歲蕤復颺沓光采  
半明滅朝陽勿遽晞留之慰超忽

少年行

白馬白如雪銀鞍耀明月騎出青雲樓揮鞭向金  
闕自言事武皇出身爲椒房結交樂通侯擅名關  
鷄塲尚主復賜第軒蓋一何光被酒過都市殺人  
如剪蒿左殪南山虎右斬北溟鰲昨朝兵符至單  
于寇臨洮奮身出玉門殺馬累寶刀橫行萬餘里  
叱咤威風起奪馬貳師城長揖見天子調笑大將  
軍醉罵柱下史生憎漢相如白首文園裏

長干行

皚如玉山雪皎如瑤臺月郎來騎白馬調妾桃樹

下桃葉何柳柳不謂君行久倚門問來船見郎寄書否

洛陽道

桃花馬金絡頭白面郎紫貂裘三月洛陽道垂柳  
蔭清溝溝水東流不記春花開花落幾迴新東風  
日暮楊花起愁殺高樓獨倚人

邯鄲才人嫁爲廝養卒婦

妾本寒家女誤入崇臺宮粉黛三千人花顏笑春  
紅君王重歌舞幼小不曾通一朝意相迕棄擲如  
秋蓬昔爲高唐雲今爲馬牛風夜夢邯鄲道不識

邯鄲中金殿秋月滿歌吹行煙空白日耀千春何  
時燭微躬

結交行

昔時韓生有豔妻其君使築青陵臺南山有鳥不  
肯來烏鵲雖小禽不受鸞鳳猜以此築臺成二人  
葬寒灰舉國見之悲且哀悲且哀斷人腸墳上連  
理樹變爲兩鴛鴦搯吭交頸綺翼張春風蛺蝶花  
飄揚君不見酈呂結交日朝爲刎頸暮拋擲如此  
結交復何益

梁園歌

朝發金臺門夕度博浪關黃河如絲天上來千里  
不見淮南山淮南桂樹弄婆娑挂席欲進阻洪波  
我今亦作梁園歌梁園昔有信陵君名與岱華爭  
嵯峨三千珠履不動色屠門執轡來相過功成不  
顯涕滂沱青蠅白璧一何多我爲梁園客不登梁  
王臺錦帆揚州門一去何時迴荒煙白草古城沒  
登臺望之令心哀令心哀歌且謠迷塗富貴苦不  
足寧思白骨生蓬蒿人生三十無少年積金累玉  
空煎熬獨立天地間長嘯視今古城隅落落一堆  
土千年誰繼白與甫攬淚浮雲灑煙莽灑煙莽風

吹卷波濤沈吟投箸不暇食蹴天濁浪何滔滔君  
不見昔人然諾一相許黃金斗印如秋毫

送友人入關

南山鬱幽幽豐水白浩浩烏啼漢城樹塵起咸陽  
道驅馬東方來長鳴翻玉啼春風吹綠艸明月滿  
關西

送友人之京

與君何處別汴州金梁橋下有古時水遙接廣陵  
潮君搖錦帆去萬里上雲霄我掇金光艸方期白  
鶴招

贈張生

攬衣斷崖口悲風振古臺  
叫鴈驚逆雲萬里天爲  
開雪榛覆寒莎松殿扃  
餘苔昔人邈安在日落寒  
色來

歲暮夜懷寄友

二首

梁客梁甫吟北風號沙林  
連山激湍波海氣結愁  
陰雖持一杯酒而有萬古  
心越鳥不巢燕代馬不  
戀越天明太行雪霜凍洛  
門月颺颺湘流淡冥冥  
蒼梧隔逝矣空離憂芳蘭  
爲誰結

歲窮長年悲越吟遊子思  
寒風起枯楊夕坐知天

霜落星動海白飛沙吹雲黃蕭蕭孤蓬轉萬里何  
超緬沈吟卷道帙惻愴淚如霰入河討沈淪蹈海  
事游行傳書寄麻姑與爾期相見

行歌古澤中

川原望不極愁思滿歸襟雲蔽長安目水流湘浦  
心頽陽滅遠樹積雪明寒岑醉起海月照行歌入  
霧林

十六夜

唧唧復唧唧當戶鳴促織月中何所有云是仙桂  
枝此桂開花復結子安得夜夜常不虧君不見梁



園酒一斗錢十千昔時信陵有賓客不飲豈足稱  
豪賢直須酩酊臥艸澤明日射獵睢陽川

戲作放歌寄別吳子

惟昔少年時彈劍輕遠遊出門覽四海狂顧無九  
州獻策天子賜顏色錫宴出入黃金樓揚鞭過市  
萬馬辟半醉唾罵文成侯結交盡是扶風豪片言  
便脫千金裘彎弓西射白龍堆歸來洗刀青海頭  
崑崙河磧不入眼拂袂乃作東南遊江海洶湧浸  
日月島嶼蹙蹙混吳越匡廬小瑣拳可碎鄱陽觸  
怒踢欲裂澤中龍怪能人言噴濤吹浪昏漲天大

鵬舉翼四海窄笑爾弋人何慕焉東吳子君非洪  
恣闇穆取位之丈夫余亦豈卑卑與世而浮沈恂  
復共闕非庸劣廉藺終投萬古欽攀鱗掃氛代不  
乏我豈復戀頭上簪鹿門黃犢穩足駕商顏紫芝  
山固深有飛倘附秋空音

程生遊華山歸也誇我以絕觀動我以靈  
篇爰贈此章抒我夙悰

君行值杪秋飄飄登雲巔笑弄石蓮花俯漱玉女  
泉秦時采松女有無嬉紫煙雙騎兩茅龍曾逢呼  
子先夜棲何峰室遇師叩何銓一虎嘯海月萬壑

驚風旋颺然毛骨換錯落神光圓  
晨興板長蘿朗詠青霞篇  
黃河衣帶去蓬萊瞪目前  
赤日跳扶桑仙掌發紅鮮  
伊余歎茲游挂心三十年  
夢想落鴈頂攜詩問青天  
林麓限層雲奮飛悵無緣  
安能振衣去共爾追羣仙

懷湘曲

湘筠寒翠滿白日起秋雲  
美人杳何處江氣長氤  
氲手持紫玉管遙望青霞君  
藹藹波水暮何由致殷勤

相逢行贈袁永之

清晨客叩門投我一書札  
開緘錦雲爛鏗然玉相  
戛問客何方來新下黃金臺  
揚鞭指河洛迴旆陵  
高崖選珍掇琪艸探美收  
璵瑰路逢赤松子並舉  
收氛埃道同心乃冥神  
投誼難乖古人重良契  
豈必聲影偕行行報嘉績  
貢此明堂材

梁園風雅卷二